



KOPI PAHIT

Alhamdulillah kita mengucap syukur ke hadrat Allah *Subḥānahu wa Ta’ālā*. Jemaah-jemaah haji telah balik ke tanah airnya. Semoga dan tentu di antara mereka itu ada pula cerdik pandai dan alim-ulama. Mereka turun dari kapal dengan pakaian serban dan pakaian-pakaian Arab dipakai dengan megahnya. Kemegahan mereka tentunya, boleh jadi, dipandang oleh orang-orang mengatakan “ulama moden” termasuk golongan kolot kerana kalau katanya dahulu waktu di jabatan kerajaan ia terpaksa berjubah, sekarang sudah berubah, sudah memakai pantalon¹ dan *necktie*, yang dipakai berasal dari Barat – ia sudah jadi ulama moden dan fikirannya luas mahu puasa pakai hisab, ditolak rukyah sebab menyenangkan orang berhari raya untuk menyediakan kuih-muih – *Ma shā Allāh!*

* * *

Ilmu tidak terletak pada pakaian. Ilmu dipandang tinggi dan mulia kalau padanya ada akhlak yang mulia. Akhlak yang mulia janganlah mengkritik seseorang kerana kulit pakaianya tetapi isi hatinya. Kesukaan seseorang dengan memandang kepada pakaian – selagi menutup aurat tidak jadi halangan. Tidak mengapa ia bersongkak ketayap tidak ber*necktie* kolar, tetapi yang dipandang ilmunya. Sayyid Jamaluddin al-Afghani – berserban dan berjubah. Muhammad Abdur berserban dan berjubah – mereka dimuliakan orang – bukan pakaian yang

dipandang orang tetapi ada pula ulama-ulama moden yang dahulunya berjubah dan berserban tiap-tiap hari, sekarang di ibu kota hari-hari pakai *necktie* kolar mencabar orang-orang yang berserban, ulama-ulama fesyen tua dengan pakaianya. Ingat-ingatlu²! Kalau mahu buat – buat jangan cacat orang lain – kerana kalau mencacat orang lain, orang lain juga mahu cari kecacatannya.

* * *

Seorang pemimpin Melayu (sekurang-kurangnya ia orang Melayu) ada bilang bahawa sekarang tidak boleh lagi berjuang menegakkan kerajaan Melayu. Ini perkataan dari seorang pemimpin Melayu dan oleh itu apa hendak dikatakan? Jawabnya hanya.. ya hanya .. serahkan sahaja kepada takdir!

* * *

Kita dengar ucapan seorang anggota *Parliament* yang baru pulang dari haji bercerita bahawa ia hendak membuat satu syor dan kerjasama antara Malaysia dan Saudi Arabiya supaya menjaga keselamatan orang-orang haji, iaitu supaya jangan berlaku ada orang mati terpijkat tatkala melontar di Jamrah dan supaya orang-orang haji jangan sesat di Makkah. Kita kepingin nanti mendengar syor-syor Yang Berhormat itu barangkali begitu mahu melontar di Jamrah mesti “line VIP” dan ada mata-mata mengawal perjalanan jemaah haji Malaya kalau berjalan masuk ke Masjidil Ḥarām. Kalau

syor ini diminta tentunya berabih! Sebab haji-haji yang datang dari Malaya bukannya orang bandar sedangkan di Kuala Lumpur mungkin sesat apa lagi di negeri yang tidak tahu bahasanya. Di Jamrah kalau “line VIP” tiga hari tak berhenti-henti orang melontar! Habis apa yang beliau mahu! Ha! Ha! Ha! *Election* hampir sangat barang kali – ini kan satu kempen juga? *Wa Allāhu-a ‘lam.*

* * *

Malaysia sekarang sudah mulai sibuk menghadapi pilihanraya. Calon-calon politik telah mulai keluar dengan ramainya mencari undi dan kepercayaan rakyat. Berbagai-bagai janji dibuat oleh calon-calon supaya ia dipilih untuk jadi wakil rakyat – dan parti-pari besar berusaha supaya ia dapat memerintah semula kalau ia menang dan dipilih. Tentunya tidak ada janji yang tidak manis dibuat dan diikrarkan untuk faedah rakyat, tetapi.. ya tetapi.. adakah dapat janji-janji itu ditepati? Bagi orang-orang Islam hanya mengukur orang-orang yang tidak menepati janjinya dari maksud sabda Nabi: “Orang yang tidak menepati janjinya ialah orang yang munafik.” Oleh itu berhati-hatilah berjanji – kalau tidak tertepati janganlah berjanji, apa lagi kalau berjanji sama...

Cemeti al-Fārūq

Silap

Di bawah gambar Masjidil Ḥarām pada muka (6) perkataan “Makkah al-Murmakkah” hendaklah dibaca “Makkah al-Mukarramah”. Harap maaf! – Pengarang.

¹ Berasa daripada bahasa Inggersi pantaloon, merupakan sejenis seluar.

² Perkataan sebenarnya adalah ingat-ingatlah.